

# Bekalan cukup menjelang Ramadan

**K**UALA LUMPUR: Peniaga pasar basah sekitar ibu kota yakin bekalan barangan jualan seperti ayam dan sayur-sayuran mencukupi sempena Ramadan hujung bulan ini memandangkan faktor cuaca dan corak pengeluarannya ketika ini stabil.

Tinjauan Harian Metro ke beberapa pasar basah antaranya Pasar Borong Selayang dan Pasar Besar Taman Tun Dr Ismail (TTDI) mendapati rata-rata peniaga yang ditemui menyatakan keyakinan mereka terhadap perkara itu dan menjelaskan masalah kekurangan bekalan jarang berlaku walaupun permintaan sesuatu barangan itu tinggi.

Peniaga ayam mentah, Amir Ikhwan Azhar, 23, berkata dia tidak mempunyai masalah berkaitan bekalan ayam setiap kali menjelang Ramadan ataupun musim perayaan memandangkan stok ayam mentah diperolehi daripada tiga pembekal berbeza.

Katanya, dia mengakui bi-



**CUKUP..**Amir yakin bekalan ayam di kedainya mencukupi sepanjang Ramadan.

langan jualan harian bertambah sekali ganda apabila tiba-banya Ramadan, namun bekalan tetap mencukupi walaupun permintaan tinggi.

“Selalunya, ayam mentah dijual 100 sehari, namun jua-

lannya mampu mencecah lebih 200 sepanjang Ramadan dan musim perayaan lain.

“Ayam mentah tersenarai antara barang kawalan ketika musim Ramadan dan menjelang perayaan, jadi peniaga

tiada hak menaikkan harga sesuka hati dan ia sekali jua menjadikan corak jaluannya lebih sistematik. Orang ramai tidak perlu bimbang dengan bekalan ayam dan daging di pasaran kerana ia

mencukupi,” katanya yang menjual ayam mentah pada harga RM8 sekilogram ketika ini.

Bagi peniaga sayur-sayuran, Tan Kai Hiong, 39, berkata antara beberapa barangan yang mendapat permintaan tinggi ketika Ramadan adalah cili merah, kacang panjang, kangkung, limau nipis dan tomato.

Katanya, ada antara barangan itu mengalami kenaikan disebabkan faktor pengeluaran termasuk keadaan cuaca seperti hujan, namun masalah itu tidak mengganggu kuantiti bekalan kepada pelanggan.

“Anggota dan pegawai penguat kuasa Kementerian Perdagangan Dalam Negeri, Koperasi dan Kepenggunaan (KPDNKK) sering menjalankan pemeriksaan di premis perniagaan termasuk pasar borong, pasar malam dan bazar Ramadan bagi memastikan peniaga tidak ingkar arahan sedikit sebanyak membantu melancarkan perniagaan kami,” katanya.